

KA BATTEU EI NGAIDAM DIN

Ka chung ua thil hikhial te ka ngaidam sek gual un, nangin le ka thil hikhial teu ngaidam in (KLB 534)

Lalpa pauchapna hi gingtu masaten kochuamte mat thei ding ah thumal khenkhat lemtuak in Biak In leh mun dang ah i mang uh a hi. Bible a pat i mu dan ua chun “Ka bat teu ei ngaidam in, kei unle ka thil ba teu ka ngaidam sek gual un” ti hi Bible kilê dan tuangpi a hi.

Israel mite kiang ah Jehovah Pathian thupiak chu a mi te’n Jubilee kum (Lev. 25) pha tak ah mang ding in a zilsak hi. Jubilee kum a hin sum leh pai leh suak leh sal te bep ngaidam leh zalênsak ding hilo in a chennau gam lo ah a nei lai teu natiang le zalên sak ding ti a hi. Israel nam te chun Jubilee kum a hin a thil ba teu ngaidamna chu a la nei sek uh a hi zia kin hangsan tak in zia pauchapna hi a sâm ngam ding ua Lalpa Jesu khan a zilsak a hi.

Thuthungthak thîlna mit ah i et chun ngaidam ngai hi sum leh pai leh In leh lo kibat bep hi a hi pua, i chung ah thil hikhial zosia hi ngaidam ding in ei zilsak a hi. A hikhialna ngaidam dawn tute leh ngaidam dawnlo te le huam vek in ngaidam ding in ei phût nalai hi.

Unau dawitak, la Insak leh la In thang, la gual leh pai, la kochuam mipi te haw zosia tawh kicham dial dial ah khawsak la nuam em? A chabi umsun chu ngaidamna hi a hi. Nang in mite thil hikhialna la ngaidam chun, van ah la Pa’n le nangma hung ngaidam intin, kipakman dang khat a hung piak ding chu chamna leh muanna a hi.



Kochuam Huang

1. Sunday School Committee Thu Suak

July 14, 2022 ni ah Manipur Area Sunday School Committee thusuak pawimaw khenkhat sulang hitiu.

- Pathianni sun Naupang kikhawp hi kumthak 2023 a pat mat pat a hi thei na ding in, a puihuaina bu le buai pi pat ngal a hi. Zia gual ma chun Khangdawng kikhawp leh Vacation Bible School puihuaina leh zillai bu ding te le buai pi ngal a hi.
- Kum 2023 a pat matthei ding in Kochuam tin Sunday School Secretary Record Bu leh File ding le guanggal piak guat a hi.
- MSSU Training paper hile Vaiphei pau ah ledawk ah matthei ngal ding ah guanggal a hi tai.

2. Rostad Memorial High School

Board of Secondary Education Manipur in HSLC result 2022 a suakdaw sak ta, eimau school ngei le Pathian

zal in dinmun hawitak ah i ding nalai ua hiat a hia kipak a um khawp mai hi. Lawtinna chang te kipakpina programme July 16, 2022 ni khan mat a hia, Rev. PB Zosapthara, Administrative Secretary in award piakdawna a nei ah, Rev. K. Jama Vaiphei, Board member in tîlkhona thucha a gen in pauchappiakna a nei hi.

1 st Division	: 9
2 nd Division	: 13
Compartment	: 7
Fail	: 1

3. Senate Result Suak

Senate of Serampore result a suak ah, i zillai nei teu MTH leh BD zilte haw *back subject* nei umlo in pha takin a passed kim ua hiat a hia kipak a um ma ma hi.

4. Synod Moderator Program

Manipur Area Committee chu August 23, 2022 ahin Area Office ah nei hi ding a hi. Synod Moderator Rev. Dr. Vanlalnghaka Ralte leh a zi Pi Sangpuii (Lalsangpuii) tawh August 21, 2022 Pathianni mang ding ah hung ding a hi thu dawn a hi. Kochuam khenkhat vethakna lemchang le siampiak ngei hin a.

KOCHUAM LEH KHUA LEH TUI PHA

*Rev. Vanlalchhuanga
i/c Lamka Pastor Bial*

Khua leh tuite chu kuate ahiu em?

Tuma khan gam zosia in awptu 'lal' a nei vek sek u'i. Zia lal vaihawmna nuai ah khawsate, a gamsung ah umte chu gam khua leh tui, lal khua leh tuite ahiu. Tulai ahin le khawvel gam zosia ahin mi leh sa, a gammi a nei vek u'i. Ziate chu khua leh tui a hiu. Gamdang mi a gamsung ah chengte chu foreigner a hiu a, khua leh tuite chantum ding zosia a chan uh a thiango a hi. Khua leh tui hina chu a bik in Democracy gam ah chun gam vaihawmna chantum, dinmun pawimaw tak a chang a hi. Chun, nek leh dawn hawlina lam inle sawlkar dan tawh kikal a hilo chun zalenna liantak a nei sek hi. Gam leh nam ti leh khua leh tui ti hi thil kibanglo hingal, genkhen thei beklo a hi. Zia chu eimau (*identity*) i hina'u ahi ti leuhin hethiam mai hitiu.

Khua leh tuite chanvo

Kua hitaleh mani gam ah chun chanvo hawitak tak i nei vek u'i. Ei uh India gam ah chengtehinlekhua leh tui hinna hin chanvo lul tak i nei vek u'i. India dânpi (Constitution Part III Article 12-25) ah chun India khua leh tui te'n zalên tak leh thamuang tak ah zia gam ah hi i chen theina ding ua i diknau leh chanvo a chuang a hi. Zia chu Fundamental Rights ti a hi. Zia chu mi zosia chanvo a hi.

Kichawtden leh musit a thiango pua, dân ma ah chun kibang vek ihu. I diknau leh chanvo hi chu gen tam ngailo in hesuak mai hitiu.

Khua leh tui pha leh hi ding

Amasapen ah chun gam dan zawp a hi. Sawlkar in dan a siam a, mipite zui ding in, zia chu i leng ua phatna ding ah siam a hi. Ei uh thingtang mite chu mani umna veng/

khua ah kivaihawmna chuam nei ihi chiat u'i. Khawtang vaihawmna hi hawi lo talua ahi lo chun zui mai leh suk pitin hi ihi ding ua pawimaw a hi. Dan neucha cha leh a sunggil lam lut ding ihi puau a, khua leh tuite hi ding chu i sem zaw ding uh a hi.

Village authority te, YVA te, YMA te leh a dangte hin i khawtang phatna ding un guanggalna a siam sek u'i. A sungah mite hin i zui/zawp phat utlo leh chu a pha sâng in a phalo a tung ut zaw sek hi.

Sawlkar phallo thilbawl hi khua leh tui pha bawl ding a hi puai; chuleh zawk khapte him him bawl lo ding a hi. Mat ngai leh Police in a hawl zing mipha a um puai.

Khawpi ah i chêng vek thei pua, maleh i umna taphawt ah Sawlkar dân in ei phût gual ah um leh zawp/zui hi i bawl ding uh a hi. Taithei/Gari hêk sek te'n Traffic Rules helo ah hêklo ding a hi. Midangte a dingah haksatna tuntú a kihi thei a, eima â ding ah le lau um a hi. Chun, two wheeler- scooter,

bike-ah taisek te'n HELMET khuk ding a hi. Police te a ding hipua, eima a ding a hi. Gari hektute'n ei bep i hi pua, i kiangnai ah mite le veng/ enkawm ah hêk ding, chuleh *polite* tak ah gari hêk ding a hi.

Kitêl sek gam ihu a, kitêl him ah vote hi i khe ngei ngei ding uh a hi. I zalenna'u leh i dikna'u i mang ngei ding uh a hi. Kuama thagum mang ah vote khiaksak a thiang pua'i. I dawî pen ah i khe ding a hi. Ziagual kal ah tawi sekte chu gam lungsiat lo, nam melma ahîu.

Sawlkar mi pawimawte, Contractor te, MLA te ihi maithei hi. Mipi nasêmtu kahi ti hiat zing ding a hi. Eima a ding dan in ei phalpiak khel i lak chun gucha ihi, mani luchung ah mei-am kikawi mai ihu. Gawlgukna lâk sek, diklo hi lo a h'em ti ding khawp ah gen ngam um lo khawp ah lakte hi a kidak um taluai! Zia khawvel ah hin gawtna i tuaklo maithei, mihing bawlthei khêl ah bawlthei tu, mi gawlching Pathian a um hi ti hiat a ngai

HINNA VÂK

hi. Diktak in sêm lehin, eima gilpi gual ma in midangte gilpi le lungsiat piak a ngai hi.

Chun, mipite'n le i mawpuakna'u hiat ah sukpitin a pawimaw khawpmai hi. Vaihawmtute hi Pathian guat ahiu ti Pathian thu in i mu'u a hi. Chun, vaihawmtute'n dik tak ah vai a hawm theina ding ua mipite'n lungthim dik leh hisêl put a ngai hi. Mani hamphatna ding bep hilo in midangte le ngaitua a pha'i.

Chun, khawtang thil daidawp takah etkawlte, neitu lungthim pukawm ah mat te hi khua leh tui pha chun a bawlding a hi. Private thil a hilo ziak ah daidawp lo te, khawtang nâ – construction work leh a dangte phatak a sep ding a hi. Lampi siam te'n le a hî ding dân ah siam mai apha'i. Nasem hawilo gensiat ngam lehin, ka gam a hi, kuama'n ei lungsiat piak in ei hung chei piak pua'nau. Kei a ahi ti hiat a hun takzet tai.

In leh a kîm sukthiante, mani inzawn chiat vantang lampi sukthian sekte hi khawtang

hawina leh i leng ua thiantho kigualna a hi.

Masawinna hi lian pi pi, man tam tak tak bep ahi pua, mani hithei chin thil tam tak a um a hi.

Khua leh tui pha chu gam dan in a phut gual ah umte, mani leh midangte phat kigualna ding ah khawsate ti lehin kichian mai in a. Neitu hina lungthimpu mi, hotu hi ut ziak hilo a khawtang kilawm leh kilawm lo a mawpawtu hi a kihia, mihingpite lungsiattu a hi.

Bang hem ka mawpuakna?

Kochuam hin khua leh tui pha hîna a mawpuakna liantak i nei u'i. Zia lei ah i um sung uh hin i umna gam a ding in khua leh tui pha hi hih i hi ngei ngei ding a hi.

Kochuam chu Pathian sungkuante, van khua leh tui ihu. Zia chun van gam bep a kawp pua, zia lei i chennau ah hin van hindan ei teplawk sak a tup a hi. Zia chu Pathian gam hung tung gual ah gen a hi. A tunna ding chu nang leh

kei zia khawvel ah chengte ihu. Kochuam Lal Jesu taksa, a chenna chu midangte â ding ah hing ding a hi gual in zia i chenna gam ah hin khua leh tui pha ihi ding uh a hi.

Sawlkar kivaihawm dânte, pawl chuam chuam kivaihawm dante khawtang hin dante hi Khrista Chanchinpha tawh a kituak ding a hi. Mipite chanvo ding ah Sawlkar guanggalna um, maleh mimal leh pawl khenkhat te'n a nekguk zêl ziak un mipite hamphatna ding leh masawwna ding in a thawk sek mai hi i ngaithiam theilo ding uh a hi. Ka inkuan uh haksatna

talua a tung puai ti ah gâl thîl mailo in, Khrista chanchinpha tawh a kituak em? Ti ngaitua kawm in siamphatu hi a ngai hi. Gingtute chu dikna panpi in a hangsan ding a hi.

Covid hipi ahung kipan kit ta, Sawlkar leh Kochuam in ngekna zawp a pawimaw hi. Kikaihuaina zui ngailo ti hial ah thagaumi hi a lau um hi.

Thagau mi hina chu hotute thu mat te, hepina ah midangte tawh kizawp te a hi. Kochuam mi chu thagau ah um ding a hui. Zia chun khua leh tui pha hina a paw khawm ngal hi.

MICHING

Miching pakhat kiang ahin mi tamtak hi a buaina'u leh haksatna'u ngaima ziak ah phun leh sawisêl in a hung sek ua, nikhat hi tawt pakhat a la gen ah, a nuikhawm zai zai ua, chawmkhat zaw in zia tawt ngaima chu a gen kit leh tawmcha te bep a nui ua, zia tawt ma chu a gen kit leh kuama a nuiza a um tapuau.

Ziaphatchun zia miching pa chun nuihiau in, “tawt kibang pakhat ah la nuizat zing theilo leh bang ding ah buaina kibang pakhat ah lungngai zing gua la hui em?” ti'n a genpiak hi.

KOCHUAM PITING

*Rev. K Jama Vaiphei
Joint Editor*

“...Chutichu a hi ziak in, Khrista thugin thubul lam chu taikhel in, PITINNA lam chu zuan hitiu; nasep thisate haisan ding thu leh, Pathian lam ginna ah te kibulpat kit kit talo in” Hebraite 6:1

Kochuam piting ti thupi zik ding ah editorial board in ei hun guat ua kipak um ka sai. A saitute lungthim a um dinga ka ginchak chu Hinna Vak suatu MPCS: Manipur Area kochuam Provisional Synod ah hung um ta ding ahina ziak ah bangual ah um tozêl ding a, lungthim siam lawk leh banggual ah um a, banggual lungthim put zêl hawi ding a h'em ti ngaituana hipên ding in ginchak um kasa'i. Kenle ka thiam dan dan a thanuam tak ah ka hun zik ahia, khawvel pumpi Kochuam (Universal Church) ah Kochuam Piting têna chichuam leh eimau dinmun ah Vaihawm a pang lawiupate leh a pankhawmpi (a zathuaptu) mipite'n eimau dinmun di i hiattthiam theina ding thiltup ah zik ahi ziak ah a thu kichetna ding ah tulaitak a Mizoram Synod vaihawm dan apha ettawn ding, bawlthei guat ding khenkhat leh ei uh chiadan lui a hawi zolo deu i haisan leh nutsia veng veng ding a pha i genkhak le hung um maithei, zia haw chule kuama mimal leh pawl kaww ahi puai ti i hiat masak ding uh a dawu um hi.

Kochuam piting têna zatchuam chuam a nuai ah gual hin vak gen hitiu:

1. Ama leh ama kivaihawm:

Kochuam le, Insung a h'em gamkhat gual ah kivaihawm thei ahi chun Kochuam piting ahi ti thei a hi. Mani kivaihawm

theina ding a pawimaw masapen chu Ngamna a hi. Ama leh ama kivaihawm thei ding ah kigingchalo, kivaihawm ngamlo Pa chu bangma tik in inchuan dawk thei puan a. Ziagual tho ah chun pau kibang Kochuam chuam chuam ah ala um

kipumkhatna leh masawna dawina ziak a eimau eimau pawl leh chiadân i thiamsa te'û leh i thu'û ah i kivaihawmna'û subei a chiadan thak leh i bawl dân lui leh masa teu thala lo ah Mizoram Synod chiadan: Synod level a, Presbytery level a, Pastor Bial level leh Tualsung Kochuam a kivaipuak dan, Numei lam, Khanglai lam chiadan tuchan zil leh zui i hun thua to tau va i thiam ma ma tau.

Hiat bukim, thiam bukim ti um theilo maleh a hun leh mun dungzui a i vak etdaw thei ding uh leh vak hawldaw kawm thei ding in Synod kikahiaina dânbu chuam chuam – PCI dânbupi, Mizoram Synod Kietkawlna dân, Pastoral Nasepna etkawlina dân, Synod Service Rules, Financial rules, Nupân Chungchang dân, Sunday Skul lam kivaipuak dân, KNP, KKP kivaipuak didân leh a dang ei pau in 2015 kum a khan sutdaw ahi ta. Pastor te vang vang kumthum kizawm in ei exam sak tau.

Zia bep chu hilo in ei mi tawmzaw leh gamchuam deu leh culture le a kibatlona

neucha cha umte a ding ah sukdanglam leh belap ngaite belap to zêl a hi.

Vaihawmna him him chu a thiamsa leh a bukim sa ti aum thei puai. Govt. kivaipuakna le Chief Minister a h'em, Prime Minister pangkha keilo le a dinmun ahun tu'û a, a hung pan ua leh a gam dân tawh kituak in vai ahun hawm thei zêl mai uh a hi.

A diak in Kochuam chu Pathian â ahia, kivaihawmna le Pathian Thagau puihuaina dawn kawm a Vaihawm ahi ziak in a mapuitu leh mutheilo a vaihawmtu chu Pathian a hi ti mi'n a hiat chun buaina haksatna tuak hun ah le, Pathian hung kigawl zia kin (*Divine intervention*) lamzang leh hididân a hung pawt zêl sek a hi. Mizoram Synod chiadan a chun- a fel ah fel le, a fel beklo le dân in a bithiak khêl chu kuama a panna ngai ah panzawm gua ti le aum pua, kumkhat bep pang di himaleh Aizawl khawpi sung ah cheng sa hilehle Moderator ah pang pen pen chu Moderator quarters in a kichawnlut mai a hi.

2. Ama leh ama kichawm thei

Kochuam ama leh ama thawlawm ah kitodel thei hichu Kochuam piting hite tēna titna (qualification/qualified) khat a hikit hi. Zia umzia chu- matlo theilo a pawimaw zat ama leh ama kimudaw thei tina hithei in a. Zia chu a hi zinglai ah mu zat zat mangzo ding a h'em, mu zat sang ah tamzaw budget siam ti le a um thei a, a bang chu hileh midang panpi ngailo ah ei leh ei kitodel thei i hina' u chu a sawt kit thim tai. Zia umzia chu Synod in eihun sawlpiak pastor te hile ei un a thalaw i kipiak ding uh hilehle buai talo ding ka tina a hi.

S. Kawtlian ah Jt. Presbytery i mat kum ua (Covid umma) thugentu Rev. Lalzuithang in i dinmun uh ei genpiakna khan, "Synod umsa 11 ahin, nang uh a 12na di la hui vin, tū la dinmun ua hin Population 7na la hui in, thawlawm (Finance) ah 5na lahiu ei ti kha. Hipi lēn sung a khan thawlawm banggual in ahung keniam diam ti thawmhau thimna ala um maleh Pathian lungsiatna'n a ngai in a chia

zêl a kipak um tak zet a hi. Budget strict tak in i ki-control sak ua, budget ah umlo chu pawimaw thim lehle kumkit buget a thun ding a ki-pending mai a hi. Budget ah umsa tilo ngal Finance Committe thu loin bangma sumsēna di mimal inle mâ kila theilo tawp a hi. Ziagual a chu Committe thuneina kivaipua kochuam ihu hi a buldetna a hi. Finance committee hi Manipur Area â ka tina a hi. Presbytery tin apat kiguatte, A/S Chairman na committee neisek a hi.

Kochuamte Pathian ngaisakna leh kiphalna zâl in Shillong leh Rangmente thawlawm Rampawn Presbytery haw malam in Synod office lam in lut tadi phawt maleh, i dam leh Synod hinung phatleh chu ei office lam ah hunglut leh thasîn thawlawm punbe nalai di a hi.

3. Kochuam piting tēna dang khat kit chu ama leh ama kikeklian (Self propagated) a hi:

Malai a Pathian awi tawmlai a khan zia hi a dik diak a, awilo te'n ahun awi ua, mihing pun

dungzui a thawlawm le a hung pung zêl hi. Tulai in chu zia hin gamthim nasepna lam a kawkwaw tai. Kochuam pawl khat in gamthim/gamthak nasepna a neinau mun ah a gammite'n Pathian a hung awi ua gingu a hung punbe zêl chun Kochuam chu a kikeklian zêl a hi. Kâllak a independent Kochuam ah um a h'em, pawldang ah umte'n i Kochuam ahun zawp thak ua leh zia chule kikeklian chikhat chu ahi tho hi.

KHAIKHAWMNA –

Kochuam piting hiding ah têna chichuam chuam i gen tauva; piting hina ding a chun i population le kuate a h'em khat zat hidi, amau thawlawm nei zat i nei tak leh piting hidi, inchuan thei hidi tina a hipuai, i phâk zat kham kham leh thawlawm le i mu khamkham mangkhawp, Thagau mangthai veina nei taphawt chu Kochuam piting a hi. A tam a tam kivaipuak dan chawai dek duk, Vaihawm te'n Committee thu ngaisaklo, mimal thu lianzaw, thawlawm pia tawmcha, gamthim veilo, Kochuam siat leh phat, masawn leh sawnlo pawna

le umlo chu Kochuam piting mizia hilo di a hi. A ngaidan gual lo ah Committee'n a h'em khawmpi a h'em in vai a hawm lehle nuak diaklo, kingaitawm tak leh thumang tak a zui Kochuam leh mimal hina chu Kochuam piting zia a hi.

Mizoram Synod kivaihawm dan a chun Committe chuam chuam ah member dile Presbytery tin apat bangzat hem bithiak sa dungzui a Presbytery Khawmpi'n ahun guat ua, Bialtin, Presbytery tin kila dial dial a Committee siam a hi sek hi. Presbytery khat ah tampi abûng ah pang ziang theilo a hi. Phaidung lam member tampi Thingtang lam pakhat pani bep pang ti umlo, atangpi kitanggual thei pen ah kila ahia, Bial O.B. di ziang haw le a Bialsung ah khua te a kitanggual thei dipen a kila, Presbytery ah le ziagual tho a chu Presbytery sung ah bialtin apat committee member di kilakhawm a Office Bearer/ Chairman, Secy. leh a dang dang kiguat a hi.

Ziate ban ahin mipawimaw khenkhat amau Presbytery ah guat ding ah a quota

HINNA VÂK

kidailo venna, Synod guat ti ah guat belap ama Synod leh neu dungzui a fixed a hi. Dan tawh a kituak laisia a tamzaw ngaidan in thupukna lak ahia, dan tawh a kituaklo phat leh a tamzaw phasak le dan tawh kituaklo ahi chun, majority sang in dan umsa chun thu a nei zaw, dan dungzui ah sukpuak leh chiapi a hi sek hi. Niangkâi thim bang maleh dan dungzui leh committee thil kibawl nana na chu bawl

khial a tawm ah, a kibawl khial kha aum lehle Committee leh khawmpi ma in sukdik a hi sek hi. Mizoram Synod ah member nuai guk val kikkaikhawm thei dan leh a gamthim nasep dan teu henuam in Church of South India te leh a dang dang te'n study bawl di a hung kisawl sek u'i.

Kochuam piting zia i nei uh leh i zui teu mangthiam ah masawn zêl thei ding in Lalpa'n i mau ei pui zêl ta hen.

DAWHA

Chi (salt) zuak sek pakhat hin nisin in bazar ah a zuak ding in a Sabiltung puak sak in a chia sek a.

A lampi ua chun luicha luang palkâi ding pakhat a um ah, nikhat chu lui ah chun a Sabiltung chu kupalpai in a chi puak chule tui lak in tamtak a luangmang ah, a puak chu a hung zangkhai ah Sabiltung chu a kipak ma ma a.

Zia chu zawngsak in Sabiltung chun kilepna'n nisin in a nei zing ta, a pu chun a hun hiatdaw phat in zillai piak di ti in nikhat hi patchawn a puaksak ah, Sabiltung chun a dawha mang in nidang ah a bawl gual chu a bawl kit leh a puak chu zâng chuam malak in a gik zaw ta'i.

Zia ni kipat chun dawha mang in a kilep tapua, a pu chu a kipak ma ma ta'i.

KOCHUAM CHAWPNA

Upa Mangkhokhai Gangpimual Kochuam

Pathian Kochuamte ama thisan ngei ah a leisate chu vâk dingin, nanghaw leh la gangualte'û chungah chun chingthei un, Thagau Thiangtho chun amau haw chu entûp zing dingah ahun kawite chu la hingal un (Nasepte 20:28).

Tulai Kochuam vâktu nasepna (*Pastoral Ministry*) hi eihaw patdawk ahi pua, Thuthung Lui hunlai ah Pathian in Jawlneite mangah nâ ala patsa sunzawm ihu. Ziaziak a chun zia nasepna hi i hiatchian diak theina dingun, Thuthung Lui ah Jawlneite hinkhua i hiat masak uh a ngai hi.

Amasapen in Jawlneite chu Pathian in sepding bîk nei ah a kodawte ahiu a, Pathian in sepding bei in kuama a ko ngai pua'i. Mihing thatnawp thu ah Jawlnei dingah Pathian in amat a um thei pua'i. Chuleh, Pathian in a sep dingua a kona chu sêmzo thei dingin a Thagau thilhitheina'n a thum zui ngal a hi. Jawlnei dingah ko ah umte hi mi chungchuang ahi diak puau a, a chipite'û lak a mi vantâng mai a hi zaw'û. Jawlnei chu Pathianin ama thasang ah thugen dingah a kodaw, a sep dinguh kichiantak ah a kodawte chu ahiu. Jawlneite chun mipite diklona

kaw in a kiangua Pathian in a gennawpte chu gensawn in a diklona'û a kipat lamdik ah puizan chu a mawpuakna'û a hi. Amau nawp leh nawplo thu le panglo ah hangsan tak mai a pathian thucha amau hina ah gensawn chu a nâ'û a hi.

Jeremiah 1:7na chun, 'Chun Lalpa'n ziagual ahin ei dawnhu ah, ka naupang taluai tikin ka hun sawlna taphawt ah chia in la tin, la gen dingah kahun piak cha cha chu la gen mai ding a hi atia.'

Jeremiah 9:1na chun, 'Aw, ka luchang hi tuinâk hi hen la, ka mitte hile tuinâk gual ah

HINNA VÂK

mitthi tui in luang hen la, ka mipi thalup ah umte ziakin a sùn a zân in kap maileng kati ngei ei! chuleh

Jeremiah 20:9na chun, 'Ama chu gen puak ta pua'ng ka tin, a min inle thu gen kit ta pua'ng ka, kati leh la ziaphat chu leh, ka thengsung ah meiâm um gual in, ka thipsan thei pua'n; ka thip hiat hiat leh la ka thuak zo sek pua'n ka thipsan thei diak pawngal a' a tia.

Jawlneite a kona leh i puitu masa eila mualliamsante nasepnate a kipat hin, ei haw tulai Kochuam enkawltute dinmun mawpuakna sep ding dân tapi ei kawkmua a hi. Kochuam enkawltu nasep hi eima mihing phul thu leh thatnawp thu ah sepding ahi pua, Pathian Kona diktak leh kichiantak ah helote chu kipat vanglak ding le a hi pua'i. Pathian ko hilote zia nasepna ahi ahung pan phat ua leh, Kochuamte lam diklo ah pui in, amau hinkhua ngeile siatna'n a tawp sek hi. Kochuam etkawlna nasep hi nâ thiangtho pen, nâ chungnung pen leh nâ haksa pen ahi ziakin

Pathianin a kote bep in a sêm thei u'i. Masanglai ah thiampu nâ kha Levite bepin a sep thei gual un, Kochuam vâktu nasep hi a nuam taphawt a kiman man leh a taima ma in a sep chî vâng hilo a hi. Pathian in a kote chanvo a hi. *Pathian in a kote sepding bîk ah a chanvo uh ahi ti ah, sêmtute chapona ding leh kiletsakna ding bangma a um pua'i. Pathian in eiko ah zia sêm ding ah chun ei thuam a, eima lamkâi ah bangma i suan ding umlo a hi.* Lalpa nâ ahia, eimau mangcha in zia nâ chu ama ma'n a sêm zaw a hi. Lalpa'n a nasepna ah kithuapi dingah ei ko hi chanmun vangpha ah kingai in, kingaitawm takin Lalpa nâ chu i sêm ding uh a hi. Ziagual ah sêm dingah chun Lalpa ko i hi tâk ua ahi chun banggual in Kochuam vâk dingin i kingaitua diam, kuama pianpi felna leh titna ah tingzo ding um puan a.

Himaleh pathian chu ama muang ah, ama a dingah kiphal ah, kipumpiakte tingzo ah ala siamsek tu chu a hi. Kochuam nasêmtu min chuam chuam i nei ah, Thuthungthak

Kochuam i bulpi ah nasêmtu min chuam chuam i mute'ú hile, Thuthungthak ah ala neisate'ú a hi ta, Rome 12 : 1 - 8. Eph 4:11-13. Ziagual ahin i pawimaw dân zêl un i mangcha'ú a hi. Thugentu, Sunday School ziltiltu, Biakin enkawltu, KNP leh KKP puitu, La puitu leh Pâkcha enkawltu tiangin i nei tau ah, zia khêl ahin Pathian nasêmtu office chuam chuam a sêmla um hi. Mi'n Kochuam nâ a sep chun a khawitak mun chu lua leh, eima hinkhua kisuthiangtho ah Pathian dawidan a dik tak ah anâ a sep chu thagaulam leh taksalam ah kipumkhatna leh i khanletna dinguh chu a hi. Kochuam nasepna langsaltak leh pawimaw tak mai chu missionary te a hui. Amau hi In leh lo nusia ah gam gamla zawk ah Lal Jesu ginglote kiangah chanchinpha hiltute ahiu ah, Kochuam in a ngaisang ah a ngai pawimaw bawk a hi. Chuleh office sêmtute

leh Kochuam nasepna bak chuam chuam langsal beklo ah sêmtu i hi ziaakah kithâda pal khak hi a bailam ah, eima kikawi dan sângin Kochuam mipite hin ei hechian zaw uh a hi. Zia zia a chun ka nasep dan leh ka hinkhua in Pathian nasêmtu dinmun kilawm tak ah mat chu a pawimaw khawpmai hi. Biakin kikhawp ngai pawimaw te, kochuam aw ngai thiamnate leh mimal hinkhua matdan thiam hi a pawimaw khawpmai hi. A hîna leh a dinmun thu in vâng mawpuakna leh nasepna kibanglo maithei, himaleh a bulpi tak chu Pathian nasepna vek a hi. Sawlchak Paul in, midangte kiang a ka tangkopi nungah paithak a ka umlona dingin kataksa hi ka sawi zawi in ka thunun sek ahi ati'i (1Korinth 9:27). A Kochuamte thagaulam malzawlina ah vâk thei zing dingin Lalpa'n simtute zosia mal ei sawmpiak ta hen.

“Leng theilo la hi chun, tai thaw inla, tai theilo la hi chun chia in, chia theilo la hi chun, vak thaw ziang in, bangkim in malamsawn zing ding in kichawn in.”

~Martin Luther King Jr.

TITAKZET AH LALPA NASEP

(Joshua 24:14.)

*Rev. Khupneithang Vaiphei
Delhi*

Synod khawmpi lian in, tukum ah i thupi ding ua a hun tel:
Titakzet Ah Lalpa Nasep ti hi i he chiat ua, Lalpa'n Kum kimkhat nunglam a malzawlina tam tak tawh ei pui ta, Lungdam a um ma ma hi.

Titakzet ti leh Lalpa nasep, Vaiphei pau leh English ah a kiledaw dan, version khen khat vak en/zil khawm masa'i tiu.

TBS: *Ziaziakchun Lalpa lau dan thiam unla, ti tak tak leh dik tak in a nâ sêm unla.*

BSI: *Ziaziakchun, tuhin Lalpa lau dan thiam unla, TITAKZET leh dik tak in a nâ sêm un.*

UKV: *Tuhin, Lalpa lau unla, ginum tak in a nâ sêm un.*

NKJV: *Now therefore, fear the Lord, serve Him in sincerity and in truth.*

NIV: *Now fear the Lord and serve him with all faithfulness.*

TEV: *Now then ... honour the Lord and serve him sincerely and faithfully.*

NCV: *Now respect the Lord and serve him with fully and sincerely.*

Lalpa nâ, Lal nasep:

Zia thumalte hi i ngaitua dân uh leh i pawm dan uh kibang lo mai thei in ah. I kochuam in Lalnâ sepna i mat tangpi teu haw chu:

- a) Pastorte, a mawpuakna'ú leh a nasep uh.
- b) Kochuam upate, a mawpuakna'ú leh a nasep uh.
- c) Missionary gam dang ah kuan dawkte, a mawpuakna'ú leh a nasep uh.
- d) A kuandawkte â ding ah sum leh pai ah, leh pauchapna Anngawl ah pauchapna pangte.

- e) Revival speakerte leh a teamte, mawpuakna leh a nasep uh.
- f) Kochuam ah committee chuam chuam ah a mawpuakna'uh leh a nasep uh.
- g) Kochuam Numei Pawlte a mawpuakna'uh leh a nasep uh.
- h) Khristian Khanglai Pawlte a mawpuakna'uh leh a nasep uh.
- i) Mission workerte, office ah semte a mawpuakna'uh chuam chuam leh a nasep uh.
- j) Mission School ah zilsaktute a mawpuakna'uh leh a nasep uh.
- k) Sunday School ah zilsaktute a mawpuakna'uh leh a nasep uh.
- l) Biak In etkawlina nâ sêm ah pangte a mawpuakna'uh leh a nasep uh.

I Lalpa'uh Jesu khawvel ah a lenlai khan, Judate'n Pathian nâ kasep theina ding un bang ka hi diam uh? Lalpa Jesu'n Pathian nasep chu zia hi ahi; a mi hun sawl hi gingcha

leu chin, ti'n a dawnhu ah. (Joh.6:28,29).

Hebrai ziaktu chun, "Ginna lo in Pathian chu suk kipak thei a hi puai. (Heb.11:6).

Mosi mang in Lalpa chun "Lalpa la Pathian chu la lunggil zosia in, la ngaituana zosia leh la hâtna zosia'n la hepi ding uh a hi." (Deut.6:5).

Thuthung thak hun in, Lalpa Jesu'n, "Thupiak lak ah thupi pen chu zia hi ahi: 'Aw Israel ngai tiam un! Lalpa i Pathian uh Lalpa pakhat bep a hi. Ziakiachun Lalpa la Pathian chu la lunggil zosia'n, la thagau zosia'n, la lungthim zosia leh la hatna zosia'n la hepi ding a hi.' Zia hi thupiak masa pen a hi.

A panina chu zia hi ahi, Nangma la kihepi gual in la vengte la hepi ding a hi, ti hi." (Mk.12:29-31).

Tu hun ah Pathian kochuamte, gingtute haw hin, i Lalpa'uh Jesu ei thupiakte hi zawm in i kihe nau em? Nisin i ki-et thak zing uh a ngai hi.

Noah hunlai a khan, khawvel ah mite'n amau taksa nawpna leh dawidan ah a kimat tak

HINNA VÂK

ziak un, a mi siamsate chung in Lalpa a lungawi ta pua. Tui mangcha, mite leh gan hing zosia gawt chimit ding chu Lalpa thil guan a hi ta. Zia thina a pat suachakna ding in, Noah kiang in lawng Lian siam/ tu ding in thu a pe ta. Ama'n le Lalpa thupiak gual in nâ a sêmpan ngal ah, Kum tam tak lut in lawng (*ship*) chu a hun siam zota, Lalpa thupiak gual in lei chung ah ganhing zosia a kawp kim in lawng sung ah, amau sungkuan sia tawh hun amang tau hi.

Noah lawng kha i Lalpa Jesu tawh le tekhin a hia, Zia lawng sung ah gamsa chitin umte apat khan, zillai pawimaw leh guntak gingtute haw hin i nei u'i. Lawng sung ah a um sung ua khan siasial ne gamsate haw khan gamsa dangte kha, khatcha le a suna in a pet liam ui ti a kimu puai.

Tu hun ah gingtute, Lalpa na sêm ah pangte haw hin i sungkuante leh i seppite haw tawh, Lalpa ei thupiak gual ah sêm ka hi na em? Ti ngaitua kham a ting ma ma hi. Eima ngei le i mawpuakna

leh nasepna ah lung awi lo, i sepna mun ah te le lung awi lo, kigense tua ah hun mang mai mai ah i um khak ding uh hi lau um tak a hi. A tîl a pat setan hi su buai ding leh taksa nawpnate, mit mu nawpnate mang ah a tam thei pen gawtmun ah puilut ding hi a napî pêna a hi.

Lungnatnate kinak kinialnate haw hi, setan nasepna a hi ti hemil puai tiu. Gamsate siasial nete bawn in Lalpa thu mang ah lawng sung ah nuam tak ah a khawsak khawm thei ua leh, Lalpa Jesu gingtute ama dawid an ah khawsa khawm theilo i hipal chun, setan pui ah um khak ding hi lau um tak a hi. A tawpna chu gawtmun meidîl a hi ngal ah.

Zia ka ngaitua lai a hin unau-pa Khaitinlel la phuak hi eimau mimal chiat i ki-etchet thak zingna ding ua Lalpa'n ala guat hi ngei in ah.

*"Lalpa a hung phât tak chuleh,
Nanguh insungkuan la kimna
diamuh le?"*

*Ki-enchian kit thak tia le.
Lalpa nâ chu la sêm hawi tak
tak na em?"*

August 2022

*La zi la cha la suapi zosiate,
Hawitak in en pha tia.
A thi hingal a hing min puzing
khat um khan ah,
Ngaitua'n a hun lai in"*

Zia lâ hi tawh i thupi uh hi a kituak ma ma hi. I Pathian gin uhi Pathian hing leh dik ahia, Pathian thiangtho a hia, ama dikna, thianthona, hepina leh thawkhatna kikawppi ding ah ama hinna thisan ngei ah ei

hung tat a hi ti i hiat chiat uh hi, Ama lungthim gual nei ah, **Titakzet Ah Lalpa Nasepna** pang ding a ei ko ah, ei guat i hi ta ngal ua.

Ziaziakchun, i lungthim zosiau, i thagau zosiau, i ngaituana zosiau leh i hatna zosiau ah ama hepi ah, a thupiakte zawm ding in Lalpa'n simtu zosia malzawl ta hen.

SAL (*Slave*)

Sal (slave), a pu'n a sukgenthei ma ma ziang pakhat hi gamlak in a taimang ah, ziana chun Sakeibaknei pakhat a kêng ah ling a kitan ziak ah thuak gim ma ma khat a tuakkha ta, hangsan tak ah nai in a ling chu a lakdaw piak a, Sakeibaknei chun bangma law lo in a taisan ta'i.

Ni bangzat hem zaw in Sal zammang pa pupa chu gamlak in gamvak in a hung pawt ah, gamsa tamtak man in thikbawm sung in a khum a, a sawntawlai te chun Sal taimang pa chu tuakkha in a hun man ua, a pu kiang ah chun a hung pui kit tau a.

Ziaphatchun Sakeibaknei kikhumna bawm sung ah selut ding in thu a pia ta, a thi ding ah a kikawi lai in zia Sakeibaknei chu gamlak ah a panpi kha a hi ziak in bangma a law pua, chun Sakeibaknei chu tawh gamsa dang zosia chu a kikhumna'u kipat in a thadawk siksek ah, a zamdawk tau.

GINGTU HINKHUA

(Johan 13: 15 Jakob 2:17, 22, 24, 26)

*Pu Th. Liankhup
Assam Mission Field*

Gingtu hinkhua hi ahina tak a chun, Lal Jesu zuitu hinkhua ti leu hin a kichian zaw leh dik zaw in a kilang hi. Lal Jesu Pathian Chapa neisun khawvel ah mihing te gitlona apat tandawk tu ti hi chu mizosia'n i hiat uh leh i pawm uh a hi, ginglotu i ti teu inle a hiau a, a zuilo uh leh a pawm lo ziak bep uh a hi.

GINNA ziak ah Hukdamna chu a thawn liau liau ah i chan uh a hi. Ahinla zuitu hinkhua a hin a man i piak ding uh tampi a um hi. Eima hinkhua ah i thil chîn leh i bawlteu paithak ding tampi a um hi. Ziagual ma chun i zil be ding le tampi a um kit zel hi.

Bible thiam leh ginna hat khenkhat te chun Pathian thu ah i kikhawp khawmna teu hi Lal Jesu i zuina'u ah a dikzaw leh a phazaw i chia theina ding ua i kiziltilna'u a hia. I kikhawppel phat, ahilo leh kikhawp lo hun phat, ahilo leh ei mau ngen ah i um phat ua leh zia i kiziltilna'u

haw chu i mat ua i zui zel sek ding uh a hi a ti uh hi a dik ma ma hi. Tulai eihaw Khristian te leh kochuam te chu kalkhat sung ah 4-vei 5-vei kikhawm sek, zia bep chu hilo insung ah Pathian thu kiziltil te i hiu a. Chutichun ginna leh Lal Jesu zuitu hinkhua a chu piting leh ettawn tâk ma ma hinkhua nei ding te chu i hi tau. Kristiante chu i hindan, i paudan, i sep dan leh i khawsak dan te'u ah i gingtu chanpi te leh midang te a ding ah kipakna, damna, thamuanna leh ettawn tak i hi ding uh a hi. A chanchinpha i gen leh a pâkna lâ i sak bep uh hilo a, a thu a lâ tawh kituak a i khawsak dan teu ziak ah midang in Lal

Jesu hi a mu'ua a a chawihawi
zawk ding uh a hi.

Africa gam ah Khristian
Missionary khat chu a
chanchin a gên pa gual a
khawsa leh hinkhua mang
ti in a sepna gam mite'n
a mu ziaq un a pawm thei
ma ma ua. Lal Jesu kiang
in mi tamtak a pulut hi.
Gingtute'n hin dan thiangtho
leh ettawntâk hinkhua i nei
ding uh chu a pawimaw dan
a sulang hi. I um dan leh i
chetzia ten midang chung
ah ngawng a la nei ma ma
a hi dan hiatthei in a um
hi.

Chutichu a hitâk leh,
ei uh Lal Jesu ging a zuitu
Khristian kiti lak ah hin bang
gual in i kihiau in i kimu sek
uh em? I Insak i Inthang
leh i Inkiang teu leh i seppi
te'n bang gual in ei mu sek
in ei hechian diam maw,
ti hi ngaitua thak leu hin
ut a um hi. Mi tamtak chu Lal
Jesu ging leh zui ah ettawn
tâk hinkhua mang a um
lai in, mikhenkhat chu Khristian
te kikhawpna a i kikhawp vâng
a midang in ei ngai Khristian le

ki-um thei in a. I hinna'u leh i
khawsakna'u ah Lal Jesu leh
a thupiak te hi a chungnung
pên zing thei na'm ti hi i
ngaitua ah Pathian lopina ding
a thil bangkim i bawl zêl uh hi
Khristian te'n i mawpuakna'u
a hi.

India gam khawpi Delhi
tual a Aam Admi Party
(AAP) ah Hindu Pachal Pu.
Arvind Kejriwal leh a seppi
te hindu sakhua ah kulmut
te'n vaihawmna diktak
in a chia piu ah, dan leh
thupiak a hawi in a chia dik
hi ti chu mitin hiatthei in a
um hi. A gam mipite le a
lungawi un a kipak ui ti a
mu thei hi. Nasep thil bawl
in hun a mang dik ua
khantona in ma a sawn ma
ma hi ti chu mit a mûthei
leh bil a hiat thei a hi.
Thingpi dawnna ding kipiak
leh gawlguk a thil kibawl
chu um lo, a um lehle kipak
ziaq ah kibawl zaw hileh
a kilang hi. Zia party hi
sum leh pai, mihing thahatna
mang ah tingin vai a
hawm puau a, napha sep
ziaq in lawting in mipite
dawisakna chang in vai a

HINNA VÂK

hawm zawm zêl chu ahîu. Ziagual a thil hung umtheina hi a vaihawmte bep hilo in a mipi te'n le thil pha leh thudik a dawî ui ti hi a kichian hi. Ei gam Khristian za ah za hina gam ahin zia party te hin vaihawmna a chang zo diam uh ti hi ngaitua kham ting tak a hi. Lal Jesu ging ah pawm lo Khristian kiti ve lo te a pat hin zil ding tam tak i nei u'i. Diktatna, ginumna, leh thilpha bawlna lam ah te in.

Zawlnei Isaia hunlai in Israel gam kha galmuang ahia. Temple ah chia in kithawina nasa tak leh uang tak in Israel chate'n a bawl sek ua. Himaleh gitlo simna panglo ah kithawina a hi ziak in Pathian a kipak pua'i. Nekkuk chakgukna (tateleknâ) a tama, vaihawmtutelemi hausa ten mi gentheite a tawden ua, vaihawmna dik a um thei puai. A sual ziak un Pathian gawtna tuak in melmate suak leh sal ding in puimang in

a um u'i.

Unau dawitak, tuni hin nang leh kei i khuti um ui tina lam hilo in, i biak uh leh i zui uh Pa Pathian dawigual ah i gingtu hinkhuau mang ding in i kichial thak u'i. Hindan thiangtho a phalo chu phalo ti ngam leh nang ngam i hîu a ngai hi. Nisin nek hawlna leh i sepna'u ah mite'n gingtu diktak tia ei hiat thei ding uh leh zui thei ding hinkhua i nei uh a ngai hi.

Khawvel ah hin limna leh kipakna del in i pawimaw te'u i hawl sek ua maleh i mu zo ngai puau. Lal Jesu hi khawvel in a mamaw diktak ei pia thei tu um sun a hi. Khawvel ah i hawl uh limna, kipakna, chawldamna leh thamuanna te ama Lal Jesu bep in a nei hi. A ma Lal Jesu malsawm tâk a hing ah zui thei ding in hapan in pang thak hitiu.

GINUMNA

*Pro Pastor Genlemthang Suantak
i/c Mata Pastor Bial*

“Mitin chung ah patepna vantang tilo la chung un patepna a tung kha puai, Pathian chu a ginum in, la zaw khêl ua chetna la chung un tunsak pua’n a; la thawk zawna ding un chetna tawh kigual in tatdawna lampi hun bawl piak in a”. **1Korinth 10:13**

“Ziaziakchun, Lalpa la Pathian uh hi Pathian tak tak, Pathian ginum ama hepi ah, a thu zawm te chung ah suan a sang ah sim tiang ah le a thuthung leh a hepina taklang zing ahi ti hiau inla”.

Dan Lekhabu 7:9

Ginum: Ginumna chu bang hem khat i bawlna ahiloleh i kitepna dettak ah dingdet ding tite, mi ginum kiti chu kua a h'em khat kiang ah a thutepna mualsua ah nungchawn ngailo. Ginumna chu thutiamna pêl lo, gingcha zing, huntawp tiang ah buaina haksatna ah dettak ah um zing sek, bang hun ale a thuthung ah ding zing. Hebrai 13:8 *“Jesu Khrista chu zani leh tuni leh kumtuang in a ngai ngai a hi zing hi”*

Hun haksa leh hun lauthawng um buaina siatna haw hi i malam ua i hung tuak ngei ding uh a hi. 2Timothy 3:1 *“...ninunung ah te chun hun haksa tak hung tung ding a hi”* tia a gen gual ma in tuhin le hun haksatak hung tung zêl ding ti i mu thei uh a hi. Ziaziak a chun a kisazosa leh a kigingsa i um ding uh a hi. I ginnau tiang ei patep thei ding hial haksatna le hung tung ding a

hi, chun i taksannate’u le hung suling thei ding thil haw le hung tung zêl ding a hi. Paul in a gen gual in 1 Korinth 16:13 *“Kiveng unla, ginna’n ding det in, hangsan tak leh hat tak in um un”* ei ti gual ngei in ei uh Khristiante hi i masang ua thil banggual tuak ding hileu hinle ginna dingdet ah hangsan leh hât tak ah i um zing ding uh a hi.

Pathian Ah Mi Ginum

I Bible i et ahi chun miginum mu ding a tam ah, Abraham ginumna hi sau lo in vak en suk hitiu. Thilsiamthu 22 na i sim ahi chun Pathian in Abraham kiang ah a chapa Isak halmang thillat ah lat ding in a hiatsakna kha i mu, Abraham inle Pathian nial lo in ka chapa neisun sun bang ding ah ei dawn la hi em ti cha le gen lo in thipbek in a chapa neisun Isak kha halmang thillat ding in Moriah tang lam in a pui mai ahi, ei khat khat kihi leh vang kinuamlo maithei a hi. Ahinla Abraham in Pathian a muang ah Pathian â ding ah a ginumna a latsak a hi. Ziagual ma chun Pathian inle Abraham ginumna kha amu, Pathian inle Abraham kha a ginumna leh a hepina latsak in malsawmna thutiam a pia a hi.

Abraham kha Pathian â ding in ginum lo leh vâng malsawmna zosia kha Pathian apat dawng lo ding a hi. Ziagual ma chun ei uh le Pathian â ding ah bang gual dinmun in ding in bang gual haksatna gentheina thuak maleu hinle

Pathian a ding ah i ginumna' u i suklat zing ding uh a hi. Ama'n ama â ding ah ginum te chu a nusia ngaipua a kilepsan ngaipua chun a malsawm sek nalai a hi. Pathian apat malsawmna i dawnna hin enle i piakthuk ngai ah, ziachu bang a h'em iti leh i ginumna i latsak ngai a hi. Abraham inle haksat mangbatna tuak maleh a ginumna a nutsia lo ziak in Pathian in a ginum ziak in malsawmna tamtak a pia a hi.

Pathian in i do zawlo ding thil i masang ah a tunsak ngai puai. Abraham ngei le a do zaw ding chetna a pia, ziagual ma chun Abraham inle Pathian in a chetna chu a zo a, Ginum lo leh vang zolo ding a hi. I Lalpa Jesu Khrista ngei inle khawvel a zaw sa ahi gual ma in, a chate'n khawvel ah a zawlo ding bangma a guan piak ngailo a hi. I chung ah thil haksatna a h'em buaina a h'em i tuak phatleh ama ei panpi ding ah kisazo sa ahia, ziaziaik achun bang hun ah le ama ko lehin ama'n i buaina kuakhuk apat hung hukdawk ding a hi. A chate â ding ah ginum Pathian ahi ziak in.

Pathian Ah Mi Ginum Lo

Vaihawmte 15-16 na i sim ahi chun, Samson kha a chanchin i hia'ua, Pathian in a pian apat ama kha thiangtho ding ah a ko ahia, ahinla Delilah a galte nungak kha amu phat in Pathian in a kiang ah a thupiak kha a bawtsia, a ginumna a zâmsan a hi. Pathian apat a ginumna a zâmsan akhan Pathian inle a nusia, a hanta cheng a bei ta a hi. Pathian apat ginumlo te chu mualphonate thuak in zachaknate a thuak sek uh a hi. Samson ngei kha le a mitte a kheldaw piak ua, a hatnate bei in mualpho tak in a galte tawh a thi ta a hi. Pathian in lopitak ah um ding leh a galte apat a chipi a nampite hukdam ding a tilai kha mualpho tak in a thi ta a hi. Eiu le i ginum lo uh ahi chun hunkhat ni leh Pathian in mualpho tak leh zakcha tak ah ei kawid ding a hi.

Ziaziakchun Pathian chate chu i lopina ding uleh i damna ding ua i Pathian â ding ah thitiang ah i ginum zing ding uh a hi.

Mihing khat ah i piangtâk ahi chun khawiah um in bang bawli ziang leh in le ginumna tawh i pankhawm ahi chun i thilbawli lam lam inle a kilawting sek a hi. Ginumna hi taisan lo ding a hi, i insung mite â ding ah le ginum ding ahia, i khua i tui i chi leh i namte a ding ah le ginum zing a kûl hi. I sep i bawli zosia ziang ah le ginum zing a ngai hi. A ziak chu Pathian in miginumte chu a kantha zing sek ah, a hepi ah, chun a sep a bawli unle a lawtin sak sek a hi. I zawlo ding tiang uh chetna eipia ngailo a hi, i Pathian uh hi miginum Pathian ahia, ama nungzui dingte chu miginum a ngai hi. I masang ua banggual siatna tuak in i ginna'ua susia thei dingte tuak maleu hinle Abraham ginum gual in ei uh le i ginum zing ding uh a hi. I Pathian â ding ah i ginum zing ua a thuthung i zui zing uh ahi chun siatna lak apat ei kaitho intin banggual hun haksa tuak maleu hinle ama'n hung hukdam ngei ding ahi, chun malsawmna simsênlo in hung malsawm nalai ding a hi. Amen.

Naupang Sunday School-ah NAU HUAL KIKHAWP MAT DAN

~ *Rev. Lalremliana Colney*
i/c D. Phailian Pastor Bial

Sunday School hi khawvel ah school lian pen, Pathian thu Szilna bep tilo ah, hinkhua lampi dik kikawkmuna leh mimal lungthim put ding dan te kizilna mun pawimaw tak a hi. Beginner apat Senior tiang Sunday School phatak ah hung kâikim zette chu kiralpai chang nei sek maleu, a mangthai theng tak tak ngaipua'u hi. Fawell kiti New York a ukil pakhat chun "Tangval gilo 2700 ka court ah ahung puiteu chu Sunday school kâi ngailo ngen ahiu" a tia, zia umzia chu Sunday School kâi sekte sang in Sunday School kâi ngailote hinkhua chu a khawlo zaw'i tina hi mai in ah. Sunday School chun i hiatlo kâl in sual lak apat nasa takin eila veng zing sek a hi. Sunday School hin Pathian mimat lopi leh lawting tam tak a sêkdawk ta, a sêkzing ah, sêkdawk zêl ding a hi.

Mumal tak ah i chate'u Sunday School ah a chia thei uhi thil kipak um tak a hia, khawvelah kumtuang hinna tiang ei kawkmu thei school hi, nu leh paten i ngai pawimawu akul takzet hi. Manipur ahin le Sunday School hi pha tak in Kochuam tamzawte'n i nei thei ua, kipak a um ah. Tu sang ah phazaw leh mumal zaw ah Sunday School i neitheina ding uh leh, Sunday School ah naupang pawl châwn hi kum

zungzui ah châwnsak sek ahi zêl theina ding ah naupang chu a kum dik tak ah Sunday School a hung kai pat theina dingin, Sunday School kâi ding ah nau hual hi thil pawimaw tak a hi.

Nau Hual hi Kochuammi, nausen hung piangte chu kum li a tin phat ua leh Sunday School kâi ngei ngei ding ah Kochuam in a hual lawkna a hi. Zia hi hun pawimaw tak a hiziakin nausen nu leh pate'n

i ngâi pawimaw chiat ding uh a hi. Nau hualna hi kum sîn ah khatvei nei sek ding a hia, Sunday School pumpi ai-aw in Beginner PawlTe'n ma a lâk mai uh lemchang in ah.

1. Nau hual ziaik:

- Nausen chu kum li a tin phatleh Sunday School hung kâi dingah hual lawkna a hi.
- Nausen chu Pathian leh a kochuam â ding ah hual lawkna a hi.

2. Nau hual lulnate:

- Naupangte makhua dingah nu leh pate leh Sunday School zilsaktute sepkhawmna a hi.
- Nu leh Pate chu chate Pathian hiatna leh a thu zilsak pawimaw zia a hiatdaw sak sek hi.
- Kochuam in a chate'u chua hepha, a ngaisak hi ti nu leh pate a hiatsak hi.
- Nu le pate'n a chate'u Sunday School kaisak a pawimaw zia a hiatdaw khawlaw thei u'i.
- Mi kikawikângdeute le kochuam leh Sunday School

ah nuam tak in a hung pang theisek u'i.

3. Kisingsakna:

- Zilsaktute chu bial kihawm in, kochuamsung ah nau hual ding a um leh umlo In tin ahchia in hawl intin uh, nau hual dingte min, a pian ni, tha leh kumte tepte in au.
- Nau hualte min teptena bu (Register) nei ding a hia, ziatakah chun nau hualmin, pa/nu min, pian ni, tha leh kumte ziklut zel ding a hi.
- Sunday School Zillaibu hi mithiamten naupangte kum leh a psychology uh tawh kituak dingah, department chuam chuam ah um dingte kum bithiak dungzui ah a hung siam uh a hi ziakin naupang kum leh a umna department kimillo hi a dik thei pua'i. Sunday School ah naupangte chu a kum dungzui tak ua department dik tak ah a kai theina ding un, Nau Hual hin nasa tak ah hung panpi ding a hi.
- Kochuam Sunday School Committee/Kochuam-Committee guanggalna in

HINNA VÂK

kikhawpna mun chu kilawm takah chei ding a hia, a thei chun banner-te, balloon-te, Jesu leh naupang limte tâkin, chei hileh.

- Nausen nu leh pate chu Nau Hual ni phatleh pang ngei ngei ding ah chial ding a hiu a, a chutna dinguh le a chuam ah siampiak ding a hi. (Zilsaktuten bangkim a masang in a guanggal lawk ding uh a hi)
- Superintendent leh Secretary min sign sa Nau Hualna Card nei lawk ding a hia, zia Card hi Area Office ah a thawn ah lâk thei a hi.

4. Nau hual kikhawp:

- Puitu: Beginner Department Leader
- Pantu: Beginner Zilsaktute apat
- La sakkhawm: Naupang La (KLB 440-452)
- Thilpiak lâkxhawm: Beginner naupang-te a lakhawm-tu ding ah guat hileu.
- Nau Hualna leh thucha chawm: Sunday School Superintendent i/c Naupang lam

- Solo/Bible Chang gen: Beginner naupang.
- Nau Hualna Card piakdawna: Sunday School Superintendent i/c Naupang lam
- Nausente pauchappiakna: Zilsaktute lak ah pakhat pen pen
- La sakkhawm: Naupang La (KLB 440-452)
- Hunkhâkna: Lalpa pauchapna.

A hithei chun kikhawppel ah naupang/nausente leh Beginner Department ah kikhawm zosiate kipakna ding lam thilhâwm hileh e.g. Sweets, nekthei, etc. (Beginner department bep hi kikhawm chuam kham umlo ahilo leh mun kiningting lo a hi chun naupang department pumpi ah Nau Hual programme hi mat mai lê khawk pua'n ah.)

[Hiat ding ah pawimaw:Nau Hual Kikhawp hi i Calendar/Syllabus dungzui ua chun October 23, 2022 hileh mat ding ah guanggal a hia, Kochuam tin in zia hi supiting thei ding ah panlak chiat hileh pha ma ma in a.]



MANIPUR AREA CHOIR 2022-2024 ORIENTATION

2022 - 2024 Term sung ah Manipur Area Choir-te chu July 21, 2022 ah khan Orientation Programme neipi a hiu ah. Zia hun ahin General Conference 12-veina 2022 Vaihawm thupukna bawzui in Manipur Area Choir mat ding Bluetooth Speaker chawkdaw thak chu latna le nei ngal a hi.

Chuleh Manipur Area Choir 2022-2024 Convenor, Conductor leh member thak te chu zia a nuai ah gual hi a hiu:

Convenor : Tv. G.K. Lalneu
Suantak, S.Kawtlian

Conductor : Tv. Lunmuanthang,
Mata Vengpi

Members -

1. Nk. Nemdoikim, Kangvai
2. Nk. Tinglalchoilian, Kangvai
3. Nk. Hoilemkim, Pengjang
4. Nk. Kimnunnem, T.Munjang
5. Nk. Mercy Hoilunting, Hill-town

6. Nk. Kh. Mary, Hill Town
7. Nk. Kimlemting, Bible Hill
8. Nk. Evelyn Tinglalnei, Bethany
9. Nk. Tingngaibiak, Gangpimual
10. Nk. Olivia Lhinglemfel, Gangpimual
11. Nk. Bawinu Kholdoikim, S. Munnuam
12. Nk. Tingthiamkim, Canal Veng
13. Tv. Thangmalsawm, Torbung
14. Tv. Sutlianlal, S. Kawtlian
15. Tv. Pauvanglian, Nazareth

HINNA VÂK

16. Tv. Tingoulal, Hill-town
 17. Tv. Kaplunlal, Jubilee
 18. Tv. Manglunthang, Jubilee
 19. Tv. Thanglemlian, Bethany
 20. Tv. Lamgenson, Gangpimual
 21. Tv. Lallemsang, Gangpimual
 22. Tv. Paulunson, New Lamka
 23. Tv. Mangzakhum, Buallian
 24. Tv. Paukhozam, Mata Vengpi
-



New Lamka Pastor Bial KKP in branch vena masa pen Bethlehem branch, Ngathal ah, date 24/06/22 (friday) ni khan Pathian mapui na zâl in programme lawting tak in a mang thei u'i.



D. Phailian Bial KKP Puitute'n tukum a ding ah Branch vethak a pathumna - Centenary Branch vê na ala nei u'i. Biakna kikhawp

leh pel ah discussion te a nei u'i. Bial Lapawl [2022-2024] te le a kalsuanna'u masapen a hi bawk hi.



Imphal Pastor Bial Lapawl Term 2022-2023 chu Date 11th June, 2022 ni in Langol Presbyterian Kochuam ah Rev. Ngurthanmawia sailo, Bialtu Pastor in latna a nei hi.



S. Kawtlian Pastor Bial Lapawl Orientation programme chu 10th July, 2022 Pathianni sunnung 2: 30pm in nei a hi. Zia na a hin puitu in Rev. K. Neihzial, Bialtu Pastor a pang a, tilkhona thu leh pauchap piak na Upa Liankhawthang in a nei hi.

Chuleh S. Kawtlian Pastor Bial KKP te YouTube channel leh Bial Lapawl (2020-22) te lâ pani hawna leh latna chu 25th July 2022 ni'n S. Kawtlian Kochuam Biak In ah nei a hi. YouTube channel hawna leh lat na hi Rev. K. Neihzial, Bialtu Pastor in a nei hi.



MATA PASTOR BIAL KKP in Dt. 18 - 23 July 2022 hun sung in Bial KKP saina in Solfa leh Vocal Training a nei u'i. Zia hun ahin Instructor in anuai ah te hi a pang u'i.

1. Rev. Nicky Lalremmawia i/c New Lamka Pastor Bial
2. Tv. Lalthamuan
3. Tv. Songliansang



Imphal Pastor Bial KKP in D. Phailian Pastor Bial KKP ve: 22nd July, 2022 ni in Imphal Pastor Bial KKP in D. Phailian Pastor Bial KKP te vethâkna programme a mang u'i. Sûn hun ah Ball pek in nitak ah Biakna Kikhawp leh Fellowship hun Jubilee Kochuam ah nei in hun nuamtak a mang u'i. Nitak Biakna Kikhawp ah Tv. Thang Mohan, Asst. Secy. CKKP in Thugenna a nei hi.



3rd July, 2022 ni in, 2022-24 **Sugnu Pastor Bial Choir** chu, Sugnu Tribal Kochuam Biak In ah Rev. Summinlian Bialtu Pastor in latna a nei hi.

KNP HUANG

D. Phailian Bial KNP te'n Pauchapkhawmna leh seminar programme, tarik 4th June, 2022 ni in Jubilee Kochuam Biakin ah ala mang ua, zia seminar na ah resource person in Bialtu Pastor Rev. Lalremliana Colney a pang hi.



Dt. 9th July, 2022 ni in **Lamka Pastor Bial KNP** te'n tukum a ding ah a 4-veina dingin Bial Pauchapkhawmna Lamka Kochuam Biakin ah ala mang u'i.



Dt. 9th July, 2022 ni in **Sugnu Pastor Bial KNP** te'n anngawl pauchapkhawmna hun ala mang u'i.

Dt. 9th July, 2022 ni in **New Lamka Pastor Bial KNP** te'n Anngawl Pauchapkhawm Gangpimual Kochuam Biakin ah a mang ua, 7:00Am-10:00 Am chan Programme himaleh, Pathian Thagau pawlna zâl in, a hunmat uh nuam a sak bêk ziak un minute 40 lam ala mat be u'i. Lalpa'n Lopina chang hen.



Dt. 25th June, 2022 ni in **Panglian Pastor Bial KNP** te'n S. Kawtlian Bial ah T. Munjang ava ve thei ua taksa leh thagau ah kipawlkhawmna hun nuamtak ava mangthei u'i. Chun Bial KNP thatawp pauchap khawmna dt. 25th June, 2022 ni in MT. Geltam Kochuam ah a mang uh a hi.



August 2022

Dt. 1st July, 2022 ni in CKNP guanggal Presbytery chiat ah **“Sungkuan Sum Etkawl Dan”** ti thupi mang ah Seminar nei a hi.

Paper Guanggaltu - Rev. C. Lalrinliana, i/c Kangvai Pastor Bial.

Phaipi Presbytery ah - Resource Person Pi Chinglalven, General Secretary, CKNP. Mipi chiakhawm zat 200+



Lamka North Presbytery ah - Resource Person Pi Kim Mary, Committee. Member, CKNP. Mipi chiakhawm zat 160+



Lamka South Presbytery ah - Resource Person Pi Kh. Thianniang, Treasurer,

CKNP. Mipi chiakhawm zat 130+



Tanggam Presbytery ah - Resource Person Pi Neikhovak, Ex-Chairman, CKNP. Mipi chiakhawm zat 150+



CKNP Bial fan Programme -

a) Pi Ngaimoi leh Pi Biakkim te'n tarik 21 June, 2022 ni in D.Khawzim Bial ah Bial fan Programme lawk tak in ava mangthei u'i.

b) Dated 30th June, 2022 ni in Pi Kim Mary leh Pi Hoipakkim te'n New Lamka Pastor Bial KNP te vethakna a nei un hun nuamtak ava mangthei u'i.

HINNA VÂK



c) Tarik 16th July, 2022 ni in CKNP Bial fan programme S. Munnuam Pastor Bial ah Pi Neikhovak leh Pi Lamneikim te ava chia un chuleh Leilon Pastor Bial ah Pi Kh. Thianniang leh Pi Niangphal te chia in hun nuamtak leh lawktak mat ala hi.



d) 19th July, 2022 ni Kawlhen Pastor Bial KNP te vethakna Pi Hoipakkim, Asst. Secy., CKNP leh Pi Kholhling,

Commt.Member, CKNP te'n a nei u'i.



d) Dt. 26th July, 2022 ni ah Phaipheng Bial KNP te CKNP in vethakna nei. Bial fang a chiate Pi Chinglalven, General Secy., CKNP, Pi Tingzeneth, Commt.Member, CKNP leh Pi Khawlneigrace, Commt. Member, CKNP



CKNP Bial fan Programme chiatha zinglai a hi ziakin, bangma buaina umlo a Bial fan Programme mat zawm zêl a hi theina dingin i pauchapna'n delzui zêl hitui.

August 2022

Bible Society Of India
CHURACHANDPUR BRANCH
ANNUAL CONFERENCE 2022

PROGRAMME

Date : August 6-7, 2022 (Saturday - Sunday)

**Venue : Jubilee Church, Mizoram Presbyterian Church Synod
Manipur Area, D. Phailian**

Theme : “God’s Word For All”

August 6, 2022 (Saturday)

11:00 AM - 4:00 PM INAUGURAL SESSION

Conductor : Rev. Vanmawia, President

Inaugural Address : Rev. P.B. Zosaphara,
Administrative Secretary,
MPCS Manipur Area

Business Session

Reports : 1) Secretary
2) Treasurer
Business Agenda

Tea Break

Election of Office Bearers : 1) President
2) Vice-President
3) Secretary
4) Assistant Secretary
5) Treasurer

Closing Prayer & : Upa K. Songkhotuan,
Dedication of Dinner : Committee member

HINNA VÂK

August 6, 2022 (Saturday)

6:45 PM : WORSHIP SERVICE

- Chairman : Upa Sutzamang Kipgen,
Collector & Committee member
- Bible reading and prayer : Mrs. Khawlnu Gangte,
Senior Collector
- Welcome address : 1) Rev. Vanmawia, President
2) Rev. Lalremliana Colney
Pastor-Host Church
- Welcome Song : Jubilee Kochuam Lapawl
- BSI offering dedication : Upa S. Vanlalruala,
Committee member
- Special Number : ICI Central Choir
- Message : Rev. Dr. J.L. Songate, Principal,
Sielmat Bible College
- Announcement : Secretary
- Benediction : Pastor T. Chinminlian,
Collector & Committee member

August 7, 2022 (Sunday)

10:45 AM : WORSHIP SERVICE

- Chairman : Rtd. Rev. Dr. S.K. Manlun,
Committee member &
Bishop of MELC
- Bible reading and prayer : Ms. Dimboi, IEM Missionary &
BSI Patron Member
- BSI offering dedication : T. Upa Salsawmthang Inbuon,
Collector & Committee member
- Obituary : Rev. T.S. Thangta,
Vice President
- Special Number : Manipur Area Choir

August 2022

Message : Rev. S. Lama Vaiphei,
Co-ordinator,
MPCS Manipur Area

Distribution of Awards : Mrs. Ngaibiakkim, Promotional
Secretary -cum- Treasurer

Benediction : Rev. Thangkhoiem,
Committee member

August 7, 2022 (Sunday)

6:45 PM : WORSHIP SERVICE

Chairman : Upa Nang Sian pau Suante,
Collector & Committee member

Bible reading and prayer : Mrs. C. Ramzauvi,
Chief Patron member

BSI offering dedication : Upa Soitinsong Vaiphei,
Collector & Committee member

Special Number : ECA Central Choir

Message : Rev. Ginkhoiem Singson,
Executive Director, ECA

Installation of : Rev. Nenglian Vualnam,
New Office Bearers Director, Development, EBCC

Farewell Song : D. Phailien Pastor Bial Lapawl

Vote of Thanks : Rev. Dr. Lalrosiem Songate,
Secretary

Benediction : Rev. Saithanglur Joute,
Committee member

-Tea for All-